

Wirt aber der schädlich man oder wib nit ergriffen noch gefangen. So sol Graf Hartman¹ vnd sin erben oder ir Amptman das erst gericht halten vnd richten in / Muntafun da die schuld ist beschehen vber die lich oder vber das gewand won das im zugehört von siner Grafschaft wegen Vnd du andern gericht sond si aber halten ze Guggaiss³ wär aber das min egedachten / Graf albrechts² lüt Vnd die zu mir gehörent nach der tading brief sag. so Graf Rudolf sälig von werdenberg von Sangans⁴ zwüschent vns beiden herrschaften vormals betädiget hat. öch Ain todschlag täten / in Muntafun. oder mit andern sachen verschulden das man si mit stok vnd galgen sölt straffen. den selben schädlichen man oder wib sol man mir vorbenempten Graf Albrechten² vnd minen erben oder vnsrem Amptman. in min / statt gericht gen Bludentz antworten Vnd sol ich vnd min erben noch vnsrer Amptman in Muntafun darumb nit richten vnd gehört vns nit zu da ze gerichte. wär aber das der schädlich man oder wib wurde nit / ergriffen der zu mir Graf Albrechten² gehört so sol ich vnd min erben oder vnsrer Amptman vber den licham oder vber das gewand öch richten ze Bludentz. Als sich öch der ebenempt Gräf hartman¹ geklegt / hat das ich Graf albrecht² Ainen Amptman. hab gesetzt vber min wallisser in Muntafun. vnd hab inen da ain gericht geben. da ist öch berett ob dez egenanten Graf hartmans¹ lüt. oder herkommen lüt⁵ die zu / im Vnd sinen gericht gehörent vt ze klagen hand zu den vorgeschribenen minen wallisern. die sol ich vnd min erben oder vnsrer Amptman inen zu dem rechten stellen ze Bludentz vor vnsrem Amptman vnd inen da /ain gemain vnuerzogen recht schaffen vnd nit in Muntafun. hetten aber min walliser zu ainander oder min lüt zu minen wallisern vt ze sprechen. darumb mag ich inen wol ainen richter vnd amptman geben in / Muntafun ob ich wil vsgenomen was stok vnd galgen antritt. da sol ietweder herr beliben in der mass als. vorgeschriben ist vnd sol entweder herr fürbaz kain ander gericht haben in Muntafun. vnd sond öch / die Silbrier⁶ beliben bi iren rechten nach der alten brief sag. öch ist betädiget als min des egeschriben Graf albrechts² burger ze Bludentz die gewonhait hand gehept. das si dez vorbenempten Graf hart- / mans¹ lüt verboten hand ze Bludentz vnd och vor der statt ir farents güt das si vber land fürent vnd tribent oder tragent vffgehept hand. vnd in die statt hand getriben vmb